

四庫全書

史部

欽定四庫全書

史部

郡齋讀書志卷二上至  
三下

詳校官侍講學士臣法式善

編修臣程嘉謨覆勘

總校官檢討臣何思鈞

校對官編修臣孫玉庭

謄錄監生臣易藻

欽定四庫全書

郡齋讀書志卷二上

宋晁公武撰

史部其類十有三一曰正史類二曰編年類三曰實錄  
類四曰雜史類五曰偽史類六曰史評類七曰職官類  
八曰儀注類九曰刑法類十曰地理類十一曰傳記類  
十二曰譜牒類十三曰目錄類後世述史者其體有三  
編年者以事繫日月而總之於年蓋本於左氏明紀傳

者分記君臣行事之終始蓋本於司馬遷實錄者近起於唐雜取兩者之法而為之以備史官採擇而已初無制作之意不足道也若編年紀傳則各有所長殆未易以優劣論雖然編年所載於一國治亂之事為詳紀傳所載於一人善惡之迹為詳用此言之編年似優又其來最古而人皆以紀傳便於披閱獨行於世號為正史不亦異乎舊以官職儀注等凡史氏有取者皆附之史今從焉

正史類

史記一百三十卷

右漢太史令司馬遷續其父談書創為義例起黃帝迄漢武獲麟之歲撰成十二紀以序帝王年表以貫歲月八書以紀政事三十世家以序公侯七十列傳以志士庶上下三千餘載凡為五十二萬六千五百言遷沒後缺景武紀禮樂律書三王世家漢興以來將相年表日者龜策傳新蒯列傳等十篇元成間褚少孫追補及益

以武帝後事辭旨淺鄙不及遷書遠甚裴駟集解班固嘗譏遷論大道則先黃老而後六經序游俠則退處士而進姦雄述貨殖則崇勢利而羞貧賤後世愛遷者以此論為不然謂遷特感當世之所失憤其身之所遭寓之於書有所激而為此言耳非其心所謂誠然也當武帝之世表章儒術而罷黜百家宜乎大治而窮奢極侈海內彫弊反不若文景尚黃老時人主恭儉天下饒給此其論大道所以先黃老而後六經也武帝用法刻深

羣臣一言忤旨輒下吏誅而當刑者得以貨自贖遷之  
遭李陵之禍家貧無財賄自贖交遊莫救卒陷腐刑其  
序游俠退處士而進姦雄者蓋遷歎時無朱家之倫不  
能脫已於禍故曰士窮窘得委命此豈非人所謂賢豪  
者邪其述貨殖崇勢利而羞貧賤者蓋遷自傷特以貧  
故不能自免於刑戮故曰千金之子不死於市非空言  
也固不察其心而驟譏之過矣

前漢一百卷

右後漢玄武司馬班固續司馬遷史記撰十二帝紀八  
年表十本志七十列傳起高祖終於王莽之誅二百三  
十年凡八十餘萬字固既歿死書頗散亂章帝令其妹  
曹世叔妻昭就東觀緝校內八表天文志皆其補也唐  
太子承乾令顏師古考衆說為之注范曄譏固飾主闕  
蓋亦不然其贊多微文顧讀者弗察耳劉知幾又詆其  
古今人物表無益於漢史此論誠然但非固之罪也至  
謂受金鬻筆固雖諂附匪人亦何至是歟然識者或以



固書皆因司馬遷王商揚雄歆向舊文潤色成之故其  
文章首尾皆善而中間頗冗瑣良田商之才視數子微  
劣爾固之自序稱述者亦謂有所本也

後漢九十卷志三十卷

右宋范曄撰十帝紀八十列傳唐高宗令章懷太子賢  
與劉訥言草希元作註曄所撰本志未成而伏誅後劉  
昭補注三十卷觀曄與甥姪書叙其作書之意稱自古  
體大而思精未有如此者又謂諸序論筆勢放縱實天

下之奇作往往不減過秦篇常以比方班固非但不愧之而已其自負如此然世多譏暱創為皇后紀及采風俗通中王喬抱朴子中左慈等詭譎事列之於傳又贊辭佻巧失史之體云

三國志十五卷

右晉陳壽撰魏四紀二十六列傳蜀十五列傳吳二十列傳宋文帝嫌其畧命裴松之補注博采羣說分入書中其多過本書數倍王通數稱壽書細觀之實高簡有

法如不言曹操本生而載夏侯惇及淵於諸曹傳中則見嵩本夏后氏之子也高貴鄉公書卒而載司馬昭之奏則見公之不得其死也他皆類此但以魏為紀而稱漢吳曰傳又改漢曰蜀世頗譏其失至於謂其銜諸葛孔明髡父而為貶辭求丁氏之米不獲不立儀廡傳之類亦未必然也

晉書一百三十卷

右唐房喬等撰貞觀中以何法盛等十八家晉史未善

詔喬與褚遂良許敬宗再加撰次乃據臧榮緒書增損  
之後又命李淳風李義府李延壽等十三人分掌著述  
敬播等四人考正類例西晉四帝五十四年東晉十一  
帝一百二年又胡羯氏羌鮮卑割據中原為五涼四燕  
三秦二趙夏蜀十六國共成帝紀十志二十列傳七十  
載記三十例出播天文律歷淳風專之喬以宣武紀陸  
機王羲之傳論上所自為故曰制旨又總題御撰焉按  
歷代之史雄晉叢冗最甚可以無譏然其多采語林世

說幽明錄搜神記詭異謬妄之言至於取沈約之說誣元帝為牛氏子之類亦不可不辨

宋書一百卷

右梁沈約撰十本紀三十志六十列傳齊永明中約奉詔為是書以何承天書為本兼採徐爰之說頗為精詳但本志兼載魏晉失於限斷又王邵謂其喜造竒說以誣前代如瑯琊王妃逼小吏牛氏生子孝武於路太后處寢息時人多有異議之類是也後梁武帝知而不以

為非嘉祐中以宋齊梁陳魏北齊周書舛繆亡缺始命館職讎校曾鞏等以秘閣所藏多誤不足憑以是正請詔天下藏書之家悉上異本久之始集治平中鞏校定南齊梁陳三書上之劉恕等上後魏書王安國上周書政和中始皆畢頌之學官民間傳者尚少未幾遭靖康丙午之亂中原淪陷此書幾亡紹興十四年并憲孟為四川漕始檄諸州學官求當日所頌本時四川五十餘州皆不被兵書頗有在者然往往亡缺不全收合補綴

獨少後魏書十許卷最後得宇文季蒙家本偶有所少者於是七史遂全因命眉山刊行

南齊書五十九卷

右梁蕭子顯撰八紀十一志四十列傳初江淹已作十志沈約又有紀子顯自表別修然天文但紀灾祥州郡不著戶口祥瑞多載圖識表云天文事祕戶口不知不敢私載曾子固謂子顯於斯史喜自馳騁其更改破析刻雕藻績之變尤多而文比七史最下云

梁書五十六卷

右唐姚思廉撰六本紀五十列傳唐貞觀三年詔思廉同魏徵撰思廉者梁史官察之子推其父意又採謝吳等所記以成此書徵惟著總論而已

陳書三十六卷

右唐姚思廉撰六本紀三十列傳其父察在陳嘗刪撰梁陳事未成陳亡隋文帝問之察以所論載每一篇成輒奏之未訖而沒察且死屬思廉繼其業貞觀中與梁



書同上之其書亦罕傳故多脫誤

後魏書一百三十卷

右北齊魏收撰初魏史官崔浩既誅太和後始有李彪  
崔鴻等書魏末山偉綦儁更主國書二十餘年事迹蕩  
然萬不紀一文宣時詔收撰次成十二紀十志九十二  
列傳上之悉焚舊書多諂諱不平受爾朱榮子金故滅  
其惡夙有怨者多沒其善黨北朝貶江左為島夷至謂  
晉元帝為牛金之子時人疾之號為穢史劉知幾謂其

生絕脣嗣死逢剖斷皆隱慝所致後隋文帝命顏之推等別修唐貞觀中陳叔達亦作五代史皆不傳獨收書在皇朝命劉恕等校正

北齊書五十卷

右唐李百藥撰本紀八列傳四十二百藥父德林在齊嘗撰著紀傳貞觀初詔分修諸史百藥因父書續成以獻諸史稱帝號百藥避唐朝名諱不書世祖世宗之類例既不一議者少之書今亡闕不完

周書五十卷

右唐令狐德棻等撰本紀八列傳四十二貞觀中德棻請譔次而詔德棻與陳叔達唐儉成之先是蘇綽秉周政軍國詞令多准尚書牛弘為史尤務清言德棻因之以成是書故多非實錄仁宗時出太清樓本合史館秘閣本又募天下獻書而取夏竦李巽家本下館閣是正其文字而後林希王安國上之

隋書八十五卷

右唐魏徵等撰紀五列傳五十五長孫無忌等撰志三十初詔顏師古孔穎達修述徵總其事序論皆徵自作後又詔于志寧李淳風韋安仁李延壽同修五代史志無忌上之詔編第八隋書人亦號五代史志天文律歷五行三志淳風獨作

唐書二百卷

右石晉劉昫張昭遠等撰因韋述舊史增損以成繁畧不均校之實錄多所漏闕又是非失實其甚至以韓愈

文章為大紕繆故仁宗刪改蓋亦不可已焉

新唐書二百二十五卷

右皇朝嘉祐中曾公亮等被詔刪定歐陽修撰紀志宋  
祁撰列傳舊書約一百九十萬新書約一百七十四萬  
而其中增表故書成上於朝自言曰其事則增於前其  
文則省於舊也而議者頗謂永叔學春秋每務褒貶予  
京通小學唯刻意文章采雜說既多往往抵牾有失實  
之歎焉

五代史記七十五卷

右皇朝歐陽修永叔以薛居正史繁猥失實加修定藏於家永叔後朝廷聞之取以付國子監刊行國史稱其可以繼班固劉向人不以為過特恨其晉出帝論以為因濮園議而發也

三朝國史一百五十卷

右皇朝呂夷簡等撰初景德四年詔王旦先文元公楊億等十人撰太祖太宗兩朝史至天聖五年詔夷簡等

九人添入真宗朝史王曾監修曾罷夷簡代八年書成  
編年類

荀悅漢紀三十卷

右漢荀悅撰班固作漢書起高祖終於孝平王莽之誅  
十二世二百四十二年為紀表志傳凡八十餘萬言獻  
帝以其文繁詔悅舉要撮總通比其事列繫年月為紀  
三十篇凡八萬三千四百三十二字辭約事該時稱嘉  
史

袁宏漢紀三十卷

右晉袁宏彥伯在晉末為一時文宗性强直雖為桓溫禮遇每不阿屈以東京史籍不倫謝承司馬彪之徒錯繆同異無所取正惟張璠紀差詳因參摭記傳以損益之比諸家號為精密

唐歷四十卷

右唐柳芳撰初肅宗詔芳綴輯吳兢書其叙天寶後事不倫上元中芳謫黔中會高力士同貶因從力士質開



元天寶及禁中事識其本末時舊史已送官不可追刊  
乃推行義類做編年法作此書起隋義寧元年迄大歷  
十三年然不立褒貶義例而叙制度為詳

河洛行年記十卷

右唐劉仁軌撰記唐初李密王世充事起大業十三年  
二月迄武德四年七月秦王擒竇建德第九卷述大業  
都城第十卷載宮館園囿且云煬帝遷都之詔稱務從  
節儉觀其宮室窮極綺麗云

大唐創業起居注三卷

右唐溫大雅撰紀高祖建義至受隋禪用師符讖受命

典冊事

通歷十卷

右唐馬總撰總纂太古十七氏中古五帝三王及刪取

秦漢三國晉十六國宋齊梁陳元魏北齊後周隋世紀

興滅粗述其居賢否取虞世南畧論分系於末以見義

焉

續通歷十卷

右荆南孫光憲撰輯唐洎五代事以續馬總歷參以黃巢李茂真劉守光阿保機吳唐閩廣胡越兩蜀事迹太祖朝詔毀其書以其所紀多非實也

五代通錄六十五卷

右皇朝范質撰五代實錄共三百六十卷質刪其煩文摭其要言以成是書自乾化壬申至梁亡十二年間簡牘散亡亦採當時制勅碑碣以補其闕

紀年通譜十二卷

右皇朝宋庠撰自漢文帝後元戊寅止周恭帝顯德庚申為九篇以本朝建隆之元至慶厯辛巳為一篇皆曰統元以甲子貫之有五號曰正閏偽賊蠻夷以王莽十九年繫孺子更始以接建武東魏十七年附西魏豫王六年天后十五年繫中宗緒神龍朱梁十六年通濟陰天祐續同光摺晉恭帝禪宋之歲對魏明元泰常五年尊北降南始主正朔乃通譜之新意也別二篇舉字為

類各以部分曰類元慶歷中上之優詔褒焉

稽古錄二十卷

右皇朝司馬光君實編起自三皇止皇朝英宗治平末至周共和庚申始為編年

編年紀事十一卷

右皇朝劉攽因司馬溫公所撰編次

資治通鑑二百九十四卷目錄三十卷考異三

十卷

右皇朝治平中司馬光奉詔編集歷代君臣事迹許自  
辟官屬借以館閣書籍在外聽以書局自隨至元豐七  
年凡十七年始奏御上起戰國下終五代凡一千三百  
六十二年又畧舉事自年經國緯以備檢閱別為目錄  
參考同異俾歸一塗別為考異各一編公自謂精力盡  
於此書神宗賜名資治通鑑託始於周威烈王命韓趙  
魏為諸侯下訖五代劉恕嘗語光曷不起上古或堯舜  
光答以事包春秋不可又以經不可續不敢始於獲麟

恕意謂闕漏因撰一書起三皇五帝止周共和載其世次而已起共和庚申至威烈王二十二年丁丑四百三十八年為一編號曰外紀猶國語稱春秋外傳也

實錄類

唐則天寶錄二十卷

右唐吳兢撰初神龍二年詔武三思魏元忠祝欽明徐彥伯柳同崔融岑羲徐堅撰錄三十卷開元四年兢與劉知機刊修成此書上之起嗣聖改元甲申臨朝止長

安四年甲辰傳位凡二十一年

唐代宗實錄四十卷

右唐令狐峘撰初詔峘撰錄未成書貶官卒元和二年  
子丕上之當時名臣如房瑄不立傳抗直如顏真卿畧  
而不載時譏漏畧起寶應元年壬寅止太厯十四年己  
未凡十七年

唐順宗實錄五卷

右唐韓愈撰起貞元二十一年乙酉正月止永貞元年



丙戌八月初愈撰錄書禁中事為切直閣官不喜訾其非實在文宗時詔路隋刊正隋建言衆議以刊修非是李宗閔牛僧孺謂史官李漢蔣係皆愈之壻不可參撰俾臣下筆臣謂不然且愈之所書非已自出元和以來相循逮今漢等以嫌無害公誼請條其甚謬誤者付史官刊定詔擿去元和永貞間數事為失實餘不復改

唐敬宗實錄十卷

右唐李讓夷等撰起長慶四年甲辰即位止寶曆二年

丁未凡三歲武宗會昌中詔史官陳商鄭亞同修讓夷  
監修書成上之

建康實錄二十卷

右唐許嵩撰始自吳起漢興平元年終於陳末禎明三  
年南朝六代四百年間君臣行事及土地山川城池宮  
苑制置興壞用存古跡其有異事則注之以益見闡建  
康者六朝所都地名也

太祖實錄五十卷

右皇朝李沆等撰起建隆元年庚申止開寶九年丙子  
十月咸平中真宗以前錄漏畧詔錢若水王禹偁李宗  
諤梁顥趙安仁重加刊修呂端監修端罷沆代二年書  
成上之沆表云前錄天造之始國姓之源發揮無取削  
平諸國僭主偽臣頗亡事迹今之所正率由典章又益  
諸臣傳一百四人

太宗實錄八十卷

右皇朝錢若水等撰起即位止至道三年丁酉三月凡

二十年至道三年詔若水柴成務宋度吳淑楊億同修  
咸平元年書成上之

真宗實錄一百五十卷

右皇朝王欽若等撰起藩邸止乾興元年壬戌二月凡  
二十六年乾興元年詔李維晏殊孫奭宋綬陳堯佐王  
舉正李淑同修馮拯監修拯卒欽若代天聖二年書成  
上之

仁宗實錄二百卷

右皇朝韓琦等撰起藩邸盡嘉祐八年三月凡四十二年

英宗實錄三十卷

右皇朝曾公亮等撰錄起藩邸盡治平四年九月凡四十二年

神宗實錄二百卷

右皇朝呂大防等撰起藩邸止元豐八年三月凡十九年紹興中言者謂元祐間呂大防提舉實錄范祖禹等

編修刊落事迹變亂美惡外應姦人詆誣之說命蔡卞改修其後奏書以舊錄為本用墨書添入者用朱書其刪去者用黃抹已而將舊錄焚毀宣和中或得其本於禁中遂傳於民間號朱墨史云

哲宗前實錄一百卷後實錄九十四卷

右蔡京等撰前錄起藩邸盡元祐七年十二月後錄起紹聖元年正月盡元符三年正月共十三年京之意以宣仁垂簾時政非出於上故分前後錄蓋厚誣也

哲宗新實錄一百五十卷

紹興四年三月壬子太上皇帝顧謂宰臣朱勝非等曰  
神宗哲宗兩朝史錄事實多誣非所以傳信後世當重  
別修定著唐鑑范祖禹有子名冲者已有名命可促來  
令兼史事臣勝非奏曰神宗史緣添入王安石日錄哲  
宗史經蔡京蔡卞之手議論多不公今蒙聖諭命官刪  
定以昭彰二帝盛美天下甚幸十八日丙申新除宗正  
少卿兼直史館范冲辭免恩命臣勝非奏曰冲謂史館

專修神宗哲宗史錄而其父祖禹元祐間任諫官後坐  
章疏議論責死嶺表而神宗實錄又經祖禹之手今既  
重修則凡出京卞之意及其增添者不無刪改儻使冲  
預其事恐其黨未能厭服上曰以私意增添不知當否  
臣勝非曰皆非公論上曰然則刪之何害紛紛浮論不  
足恤也臣勝非曰范冲不得以此為辭今聖斷不私  
冲亦安敢有請上復愀然謂勝非等曰此事豈朕敢私  
頃歲昭慈聖獻皇后誕辰因置酒宮中從容語及前朝



事昭慈謂朕曰吾老矣幸相聚於此他時身後吾復何  
患然有一事當為官家言之吾逮事宣仁聖烈皇后求  
之古今母后之賢未見其比因姦臣快其私憤肆加誣  
謗有玷盛德建炎初雖嘗下詔辨明而史錄所載未經  
刪改豈足傳信後世吾意在天之靈不無望於官家也  
朕每念及此惕然於懷朝夕欲降一詔書明載昭慈遺  
旨庶使中外知朕修史之本意臣勝非進曰聖諭及此  
天下幸甚臣仰惟神宗哲宗兩朝實錄已上太上皇帝

聖意先定爰命宰臣悉令刪修故具載聖語於篇末云  
元符庚辰以來詔旨四卷

右皇朝汪藻編徽宗即位後詔旨未全

濮安懿王申陳一卷

紀治平中封濮安懿王時宰相奏狀及臺諫言章

邵氏辨誣一卷

右皇朝邵伯溫撰辨蔡卞章惇邢恕誣罔宣仁欲廢哲

宗立徐卨事

雜史類

漢冢周書十卷

右晉太康中汲郡與穆天子傳同得晉孔晁注蓋孔子  
刪採之餘凡七十篇

吳越春秋十二卷

右後漢趙晁撰吳起太伯盡天差越起无余盡勾踐內  
吳外越本末咸備

南史八十卷北史一百卷

右唐李延壽撰延壽父太師嘗謂宋齊逮周隋分隔南北南謂北為索虜北謂南為島夷欲改正擬吳越春秋編年未就而卒延壽後預修晉隋書因究悉舊事更依馬遷論體總叙八代北起魏盡隋二百四十二年南起宋盡陳百七十年為二史刪煩補闕過本史遠甚至今學者止觀其書沈約魏收等所撰皆不行獨闕本志而隋書有之故隋書亦傳於世

西京雜記二卷

右晉葛洪撰初序言洪家有劉子駿漢書百卷乃當時  
欲撰史錄事而未得締思無前後之次雜記而已後學  
者始甲乙壬癸為十卷以其書校班史殆全取劉書耳  
所餘二萬許言乃抄撮之析二篇以裨漢書之闕猶存  
甲乙裒次江左人或以為吳均依託為之

五代新說二卷

右唐張詢古撰以梁陳北齊周隋君臣雜事分三十門  
纂次

南部烟花錄一卷

右唐顏師古撰載隋煬帝時宮中秘事僧志徹得之于  
官閣筭筆中一名大業拾遺記

大業雜記十卷

右唐杜寶撰起隋仁壽四年煬帝嗣位止越王侗皇太  
三年王世充降唐事

貞觀政要十卷

右吳兢撰兢以唐之極治貞觀為最故採時政之可備

勸戒者上之於朝凡四十篇

大唐新語十三卷

右唐劉肅撰輯唐故事起武德止大厯分為二十類

明皇雜錄二卷

右唐鄭處晦撰記孝明時雜事別錄一卷題補闕所載

十二事

開元傳信記一卷

右唐鄭棨撰紀開元天寶傳聞之事故曰傳信

國史補二卷

右唐李肇撰起開元止長慶間事初劉餗記元魏迄唐開元事名曰國朝傳記故肇續之

幸蜀記三卷

右唐李匡文宋巨周宋居白撰初匡文記盡孝明崩巨周記止於歸長安叙事互有詳畧居白合二記以宋為本析李為注取二序冠篇復掇遺事增廣焉

次柳氏舊聞一卷



右唐李德裕撰上元中史臣柳芳與高力士同竄黔中  
為芳言開元天寶年中事乃論次號問高力士李吉甫  
與芳子冕真元中俱為尚書郎嘗道力士之說吉甫每  
為其子德裕言歲祀既久遺藁不傳但記十七事後文  
宗訪力士事於德裕德裕編次上之多同明皇雜錄

開成承詔錄二卷

右唐李石撰石與鄭覃李固言相文宗錄當時延英奏  
對事開成乃其時年號

太和辨謗畧三卷

右唐李德裕撰先是唐次錄周泰迄隋忠良罹讒謗事德宗覽之不悅後憲宗以為善命令孤楚等廣之成十卷至大和中文成上之

兩朝獻替記三卷

右唐李德裕撰德裕相文宗武宗錄當時奏對論議

開元升平源記一卷

右唐吳兢載姚崇以十事要明皇

金鑿密記一卷

右唐韓偓撰天復中為翰林學士從昭宗西幸梁祖以  
兵圍鳳翔偓每與謀議因密記之及所聞見事止復京  
師偓貶云

松窗錄一卷

右唐韋叡撰記唐故事

元和朋黨錄一卷

右唐馬永易記牛李朋黨始末自牛僧孺試賢良迄令

狐綯去位

中朝故事二卷

右偽唐尉遲偓撰記唐懿昭哀三朝故事故曰中朝

入洛記一卷

右蜀王仁裕隨王衍降入洛陽記往返途中事并其所

著詩賦

南部新書五卷

右皇朝錢希白撰記唐故事

建隆遺事一卷

右皇朝王禹偁記太祖事十按太祖開寶九年十月癸丑崩于萬歲殿先是趙普以六年罷為河陽節度使盧多遜至太平興國元年始除平章事太祖崩時宰臣蓋薛居正沈倫也今此云上將晏駕前一日召宰臣趙普盧多遜入宮其繆甚矣世多以其所記為然恐不足信也

祖宗獨斷一卷

右皇朝陸經記祖宗獨斷凡十事

聖宗掇遺一卷

右皇朝余靖撰記國初至仁宗君臣美事以備史闕

三朝政錄二十卷

右皇朝富弼上言欲選官置局將三朝典故編成一書

即命王洙余靖孫甫歐陽修編修分別事類成九十六

門

溫公紀聞五卷

右皇朝司馬光撰記賓客所談祖宗及當時雜事

筆錄一卷

右皇朝王曾撰皆國朝雜事

晉公談錄三卷

右皇朝丁謂撰多本朝事每章之首皆稱晉公言不知何人為潤益初董識志彥得之於洪州潘延之家延之晉公甥疑延之所為

嘉祐時政記一卷

右吳奎趙槩歐陽修記立英宗事并賈易論韓琦定策  
疏

富公語錄一卷

右皇朝富弼使北時所錄

曾相手記三卷

右紹聖初元祐黨禍起曾布知公論所在故對上之語  
多持兩端又輒增損以著此書云

隆平集二十卷



右皇朝曾鞏撰記五朝君臣事跡

建炎日厯五卷

右皇朝汪伯彥撰記太上皇帝登極時事

五代史闕文一卷

右皇朝王禹偁撰錄五代史筆避嫌漏畧者以備闕文  
凡十七事

英宗朝諸臣傳三卷

右不知何人於英廟實錄中摘出凡四十二人

邵氏聞見錄二十卷

右皇朝邵伯溫子文撰記國朝雜事迄紹興之初序言  
早以其父之故親接前輩得前言往行為多類之成書  
其父雍也

金人背盟錄一卷

右皇朝汪藻編記金人背契丹迄於宣和乙巳犯京城  
多採北遼遺事

圍城雜錄一卷

右皇朝王養正錄靖康末女真再犯都城事

順昌錄一卷

右紹興十年劉錡破女真於順昌城下其徒紀其功云

紹運圖一卷

右未詳何人所撰自伏羲迄皇朝神廟五德之傳及紀  
事皆著于篇

郡齋讀書志卷二上

欽定四庫全書

郡齋讀書志卷二下

宋 晁公武 撰

偽史類

華陽國志十二卷

右晉常璩撰華陽梁州地也紀漢以來巴蜀人物呂微仲跋云漢至晉初四百載間士女可書四百人亦可謂盛矣復自晉至周顯德僅七百歲而史所紀者無幾人

忠魂義骨與塵埃同沒何可勝數豈不重可歎哉

江南錄十卷

右皇朝徐鉉等撰鉉等自江南歸朝奉詔撰集李氏時事王介甫嘗謂書至亡國之際不言其君之過但以歷數存亡論之雖有愧實錄其於春秋箕子之義得之矣雖然潘佑以直言見殺而鉉書佑死以妖妄何也殆與佑爭名且耻其善不及佑故匿其忠污之以罪耳若然豈唯厚誣忠臣其欺吾君不亦甚乎

江南別錄四卷

右皇朝陳彭年撰偽吳偽唐四主傳也

九國志五十一卷

右皇朝路振撰雜記吳越唐前蜀後蜀東漢南漢閩楚  
凡九國

蜀桂堂編事二十卷

右偽蜀楊九齡撰雜記孟氏廣政中舉試事跡始末

南唐近事二卷

石皇朝鄭文寶編紀李氏二主四十年間雜事之可紀者

江南野史二十卷

石皇朝龍袞撰凡八十四傳

外史檇杙十卷

石皇朝張唐英次公撰序稱王建孟知祥父子四世八十年比之公孫述輩最為久遠其間善惡有可為世戒者路振之書未備今成此書以補其遺凡五代史及皇



朝日歷所書皆畧之

北遼遺事二卷

右不題撰人蓋遼人也記女真滅遼事序云遼國自阿保機創業於其初德光恢廓於其後吞併諸蕃割據漢界南北開疆五千里東西四千里戎器之備戰馬之多前古未有子孫繼統二百三十餘年迨至大祚失御女真稱兵十三年間舉國土崩古人謂得之難失之易非虛言耳

金人節要一卷

右陷金人所上也記金人初內侮止紹興十年共十六年事頗詳實

史評類

史記索隱三十卷

右唐司馬貞撰據徐斐注糾正舛牾援據密綴如東坡辨宰我未嘗從田常為亂蓋本諸貞也

唐書直筆四卷

右皇朝呂夏卿撰夏卿強記絕人預修新書

唐書新例須知一卷

右記新書比舊增減志傳及其總數

唐書音訓四卷

右皇朝竇革撰

唐書辨證二十卷

右皇朝吳縝撰數新書初修之時其失有八類其舛誤二十門凡四百餘事

唐史要論十卷

右皇朝孫甫之翰撰歐陽修司馬光蘇軾稱其書以為  
舊史所不及

西漢發揮十卷

右皇朝劉涇巨濟撰蜀人

唐鑑二十卷

右皇朝范祖禹醇夫撰醇夫為溫公通鑑局編修官十  
五年分掌唐史以其所自得著成此書取武后臨朝二

十一年系之中宗其言曰此春秋公在乾侯之義也雖得罪於君子亦所不辭觀此則知醇夫之從公決非苟同者凡二百六篇

注唐紀十卷

右題曰樊先生而不詳其名近代人所注新書紀也

唐史評

右題曰適適先生不詳何人門人譙孝寧為編次

五代史纂誤五卷

右皇朝吳縝撰凡二百餘事皆五代史抵牾闕誤也

三國人物論三卷

右皇朝楊祐甫撰蜀人

歷代史辨志五卷

右未詳撰人

劉氏史通二十卷

右唐劉知幾撰知幾長安神龍間三為史官頗不得志乃以前代書史叙其體法因習廢置撮其得失述作曲

直分內外篇著為評議備載史策之要當時徐堅深重  
其書嘗云居史職者宜置座右玄宗朝詔其家錄進上  
讀而善之宋子京稱唐舊史之文猥褻不綱謂知幾工  
訶古人而拙於用已觀此書知子京之論不誣

職官類

集賢注記一卷

右唐韋述撰撫置院始末及院中故事修撰書史之次  
孝明時學士名氏頗善叙事

御史臺記十二卷

右唐韓琬撰載唐初至開元御史臺中制度故事以大  
夫中丞侍御史殿中監察主簿錄事分門載次名氏行  
事著論一篇叙御史正邪得失進擢誅滅附卷末以為  
世戒

中台志十卷

右唐李筌撰起殷周迄隋唐纂輔相邪正之迹分皇王  
霸亂亡五類以為鑒戒唐相以李林甫陳希烈附皇道



荃上元中乃自表天寶初追以綴名云

翰林志一卷

右唐李肇撰撫唐世翰林院中供奉儀則制誥書詔之式

翰林盛事一卷

右唐張著撰記唐朝儒臣美事凡三十八人

史館故事三卷

右不題撰人姓名記史館雜分六門迄於五代李獻臣

金史四庫全書  
卷二下  
以為後周史官所著

宰相拜罷錄一卷

右皇朝陳繹奉詔編起范質止曾公亮所載拜罷之由  
與寶錄不同元祐史臣謂繹多出己意

樞府拜罷錄一卷

右皇朝陳繹編起魏仁浦止宋綬

翰林續志二卷

右皇朝蘇易簡在翰林院最承太宗睦遇錄國朝政事

以續肇志子著采易簡所載之餘成一卷附益之

金坡遺事三卷

右皇朝錢惟演撰載國朝禁林雜儀式事迹并學士名氏文元公述真宗禮待儒臣三事附於卷末

麟臺故事五卷

右皇朝程俱撰紹興初復館職俱首入館纂集舊聞成十二篇

唐六典三十卷

右唐玄宗撰李林甫張說等注以三公三師三省九寺  
五監十二衛等例其職司官佐叙以品秩擬周禮六官  
云蓋唐極治之書也雖不能悉行於世而諸司遵用殆  
將過半觀唐會要請事者往往援據以為實或以為此  
書雖成於開元間而不行於一時不學之言也

嘉祐御史臺記五十卷

右皇朝馮潔已撰御史臺有記始於武后時姚庭筠其  
後韓琬韋述嗣有紀著嘉祐中王疇命潔已續之乃上

自太祖建隆之元迄於嘉祐八年凡一百四年分門載其名氏行事潔已擢之子也為序傳兩篇述其父之事附於後

儀注記

封禪記五十卷

右皇朝丁謂等撰大中祥符元年詔謂與李宗諤陳彭年以景德五年正月三日天書降於左承天門鵠吻之上迄十月泰山修封事迹儀注詔誥編次成書上之御

金史曰 卷之三十一  
卷二下  
製序冠之於首

祀汾陰記五十卷

右皇朝丁謂撰大中祥符三年八月降祀汾陰御札至  
明年春禮成四年詔與陳彭年編次事迹儀注踰二年  
成書上之

皇祐會計錄六卷

右皇朝田貺元鈞兩為三司使約景德會計銀以皇祐  
財賦所入多於景德而其出又多於所入著為皇祐會計

計錄上之冀以悟上庶更立輕制使民完實而縣官有餘用者

吉凶書儀二卷

右皇朝胡瑗翼之撰畧依古禮而以今體書疏儀式附之

本朝事實三十卷

右皇朝李攸編次雜纂國朝事儀注為多

服飾圖三卷

右唐李德裕編共五十五事

刑法類

刑統三十卷

右皇朝竇儀等詳定

疑獄三卷

右晉和凝撰纂史傳決疑獄事其上卷凝書也下中卷凝子峻所續

元豐斷例六卷



右元豐中法寺所斷罪此節文也

諸路將官通用勅二十卷

右皇朝崇寧中修

紹興勅十二卷今五十卷格三十卷式三十卷

政和三年以後赦十五卷

右皇朝張守節紹興中被旨編修

地理類

渚宮舊事十卷

右唐余知古撰自鬻熊至唐江陵君臣人物事迹史氏傳記所載者悉編次之

水經四卷

右漢桑欽撰成帝時人本經三卷後魏酈道元注道元範之子為政嚴酷蕭寶夤叛死之史稱道元好學歷覽奇書撰注水經行於世

洛陽伽藍記

右元魏羊銜之撰後魏遷都洛陽一時王公大夫多造

佛寺或捨其私第為之故僧舍之多為天下最銜之載  
其本末及事跡甚備

青城山記一卷

右偽蜀杜光庭賓聖撰集蜀山若水在青城者悉本道  
家方士之言

東京記三卷

右皇朝宋敏求編開封坊巷寺觀官廨私第所在及諸  
故實極其精博

相臺志十二卷

右皇朝韓琦欲編次未成郡守李琮命郡文學掾陳申之効宋敏求河南志成此書

河南志二十卷

右皇朝宋敏求以唐韋述兩京記為未備演之為長安河南志司馬光為之序

明越風物志七卷

右皇朝姜嶼撰以明州本越地故曰明越又以郭璞注

爾雅多引江東故詳載其風物云

蜀記一卷

右皇朝張守約撰載孟昶初降至薨事

皇祐平蠻記一卷

右皇朝馮炳撰儂智高叛朝廷遣狄青平之

成都古今記三十卷

右皇朝趙朴自慶歷至熙寧凡四入蜀知蜀事為詳撫其故實以類相從分百餘門

九域志十卷

右皇朝王存被旨刪定總二十三路京府四次府十州  
二百四十二軍三十七監四縣一千一百三十五

戴斗奉使錄二卷

右皇朝王曙撰曙景德三年為契丹主生辰使祥符二  
年為弔慰使所錄也

浮休居士使遼錄二卷

右皇朝元祐甲戌春張舜民被命為回謝天遼弔祭使

鄭介為副錄其往返地里及語言也舜民字芸叟浮休居士其自號云

嘉州志二卷

右皇朝呂昌明撰以嘉州圖經增廣之

西夏須知一卷

右皇朝劉溫潤守延州日編錄偽境雜事

匈奴須知一卷

契丹歸明人田緯編次錄契丹地理官制

蕃爾雅一卷

右不載撰人姓名以夏人語依爾雅譯以華言

雞林志三十卷

右皇朝崇寧中劉達吳拭使高麗王雲為書記官既歸  
擴輯其會見之禮聘問之辭類分為八門

廬山記五卷

右皇朝陳令舉舜俞撰先是劉煥嘗為記今舉因而增  
廣之又為俯視圖紀尋山先後之次云



春秋地譜十二卷

右皇朝楊澐編十三國地皆釋以今州縣名并為圖於  
其後蓋常氏已嘗有此書而澐增廣焉

宜春傳信錄三卷

右皇朝羅誘述載其地古今人物及牧守政跡山川靈  
異云

袁州孚惠廟錄一卷

右皇朝張慤纂記仰山二神靈異之迹

輿地廣記三十八卷

右皇朝歐陽志纂自堯舜已來至於五代地理沿革離合皆係以今郡縣名或云無所謂歐陽志者特假名以行其書耳

青唐錄二卷

右皇朝汪藻撰青唐吐蕃遺種也崇寧中命童貫取湟廓西寧州擒趙懷德上為之御樓受降宰臣蔡京以下進官有差

三輔黃圖一卷

右未見撰人隋經籍志唐藝文志皆有其目蓋古書也  
記秦漢以來宮殿門闕樓觀池苑在關輔者曰三輔黃  
圖言東都不與焉

雲南志十卷

右唐樊綽記雲南山川物產雜事止咸通中

梁益記十卷

右皇朝任弁撰天禧中游宦于成都以蜀記數家其言

皆無所據依乃引書傳刊正其謬

蜀三神祠錄五卷

右皇朝井度編任四川漕日袁梓潼灌口射洪三神祠  
碑文板記成此書云

番禺紀異五卷

右皇朝馮拯撰拯淳化中謫知端州見嶺表鳥獸草木  
民俗物情舉異中原錄之類為三十門凡三百事還朝  
上之

生辰國信語錄一卷

右皇朝寇瑛撰瑛與康德與天聖六年使契丹賀其主  
生辰往返語錄并景德二年至天聖八年使副姓名及  
雜儀附於後

零陵總記十五卷

右皇朝陶岳撰永州地理志也今永州所部才三縣其  
所錄多連及數郡自序云以其皆零陵舊地故收之

南行記三卷

右王仁裕撰晉天福三年仁裕被命使高季興記自汴至荆南道塗賦詠及飲宴酬倡殆百餘篇

洛陽名園記一卷

右皇朝李格非撰記洛中園圃自富鄭公以下十九所其論以為洛陽之盛衰為天下治亂之候園圃之興廢為洛陽盛衰之候則園記之作豈徒然哉公卿大夫忘天下治忽欲退享此得乎唐之末路是也

傳記類

黃帝內傳一卷

右序云籙鏗得之於衡山石室中後至漢劉向於東觀  
校書見之遂傳於世

穆天子傳六卷

右晉太康二年汲縣民盜發古冢所得凡六卷八千五  
百一十四字詔荀勗和矯等以隸字寫之云按春秋左  
氏傳穆王欲肆其心周行天下將皆有車轍馬跡焉此  
書所載即其事也穆王好巡狩得騂騮綠耳之乘造父

為御以觀四荒北絕流沙西登崑崙與太史公記同汲  
郡收書不謹多毀缺雖其言不與皆古書頗可觀覽郭  
璞注本謂之周王遊行記最之時古文已不能盡識時  
有關者又轉寫益誤殆不可讀

漢武內傳二卷

右不題撰人記王母降

漢武故事二卷

右世言班固撰唐張柬之書洞冥記後云漢武故事王



儉造

漢武洞冥記五卷

右後漢郭憲子橫撰其序言漢武明雋特異之主東方朔因滑稽浮誕以匡諫洞心於道教使冥跡之奧昭然顯著故曰洞冥

十洲記一卷

右漢東方朔撰班固贊言朔之詼諧逢占射覆其事浮淺童兒牧豎莫不眩耀而後世好事者因取竒言怪語

附著之朔宣謂此書之類乎

楊貴妃外傳二卷

右皇朝樂史撰叙唐楊妃事迹迄孝明之崩

趙飛燕外傳一卷

右漢伶玄子于撰茂陵卞理藏之於金縢漆櫃王莽之

亂劉棻得之傳於世晉荀勗校上

閩川名士傳三卷

黃璞一本  
作皇甫璞

右唐黃璞撰唐神龍以來閩人知名於世者劾楚國先

賢傳為之

王子年拾遺記十卷

右梁蕭綺叙錄晉王嘉字子年嘗著書百二十篇載伏羲以來異事前世奇詭之說書逸不完綺拾綴殘缺而叙之

汾陽王家傳十卷

右唐陳雄撰雄本汾陽王郭子儀僚吏後又從事渾瑊幕府故傳不名第九卷錄行狀第十卷錄副佐三十三

人大將二十七人曰忠武將佐畧

降聖記五十卷

右皇朝丁謂撰大中祥符五年十月十七日聖祖降七年謂請編次事迹詔李維宋綬晏殊同編天禧元年上之

先天紀三十六卷

右皇朝王欽若集聖祖趙諱即軒轅黃帝也故欽若奉詔編次傳記黃帝事迹上之賜名先天紀御製序冠其

首

柳氏序訓一卷

右唐柳玘叙其祖公綽已下內外事迹以訓其子孫

吳湘事迹錄一卷

右唐大中中李紳鎮揚州陷湘州以罪抵死兄汝納辯  
訴其枉狀錄總裁焉

王魏公遺事四卷

右皇朝王魏公旦相真宗其子素錄遺事凡百餘條分

四卷

王文正公言行錄三卷

右皇朝王文正公曾相仁宗其第皞錄其平生言行凡六十事李清臣為之序

張忠定公語錄四卷

右皇朝張忠定公詠守蜀有善政其門人李旼紀其語論可以垂世者

西李文正公談錄一卷

右西李文正公昉也相皇朝太宗其子宗諤錄其平生所談十七事

韓魏公家傳二卷

右皇朝韓忠彥撰錄其父琦平生行事近世著史者喜采小說以為異聞逸事如李繁錄其父泌崔胤記其父慎由事悉鑿空妄言前世謂此等無異莊周鮒魚之辭賈生服鳥之對者也而唐書皆取之以亂正史由是近時多有家傳語錄之類行於世陳瑩中所以發憤而著

書謂魏公名德在人耳目如此豈假門生子姪之間區區自列乎持史筆其慎焉

魏國忠獻公別錄三卷

右皇朝韓魏公琦相仁宗英宗其門人王巖叟記其言論事實然以國史考之其歲月往往牴牾蓋失之誣也

潛德錄一卷

右皇朝呂誨獻可之孫撰記其祖乞立英宗言章

文潞公私記一帙



右皇朝文彥博所撰元豐初王堯臣之子同老以其父至和中所撰五英宗為皇子詔草上之且曰時宰相文彥博富弼知狀神宗以問彥博彥博具以實對至元祐中賈易為言官因為韓忠彥爭辨其事彥博乃著此其後云自古唯霍禹云縣官非我家將軍不得至此楊復恭自稱定策國老謂昭宗為門生天子皆鞅鞅不道之言卒被夷滅

鍾山日錄二十卷

右皇朝王安石介甫撰紹興間蔡卞合曾布獻於朝添  
入神宗實錄陳瑩中謂安石既罷相悔其執政日無善  
狀乃撰此書歸過於上掠美於己且歷詆平生不悅者  
欲以欺後世於是著尊堯集及日錄不合神道論云

嘉祐名臣傳五卷

右皇朝張唐英傳仁宗朝賢臣五十餘人

晁以道揚雄別傳一卷

右族父詹事公撰雜取諸書所載雄逸事為一編系之

以贊

忠臣逆臣傳三卷

右皇朝楊堯臣撰忠臣謂李若水逆臣劉豫也

相國鄴侯家傳十卷

右唐李繁撰繁鄴侯之子也太和中以罪繫獄當死恐先人功業不傳乞廢紙拙筆於獄吏以成傳藁戒其家求世間人潤色之後竟不果宋子京謂其辭浮侈云

唐宋科名分定錄三卷

右不題撰人元符間所著書也序云己卯歲得張君房  
所誌唐朝科場故事今續添五代及本朝科名分定事  
迄於李常寧云

開元天寶遺事四卷

右漢王仁裕撰仁裕任蜀至翰林學士蜀亡仁裕至鎬  
京採摭民言得開元天寶遺事一百五十九條

明皇幸蜀記兩卷

右唐宋巨纂記明皇幸蜀迄於復歸京師

傳信錄

右皇朝鮮于綽大受撰記國朝雜事多言元豐後朝廷政事得失人物賢否

譜牒類

姓源韻譜五卷

右唐張九齡撰依春秋正典柳氏萬姓錄世本圖摭諸書纂為此譜分四聲以便尋閱

元和姓纂十一卷

金少口八卷之三  
卷二下  
右唐林寶撰元和中封閭某於諸家姓氏為太原其人  
乃言非本郡憲宗令宰相命寶纂諸家姓氏外各依四  
聲類集每韻之內則以大姓為首

鮮于氏卓絕譜一卷

右唐書藝文志有其目喬琳撰紹興初鮮于戡續之

闕里世系一卷

右皇朝孔宗翰重修孔子家譜也唐藝文志有孔子系  
葉傳今亡其家所藏譜雖曰古本止叙承襲者一人故

多疎畧宗翰元豐末知洪州刊於牘紹興中端朝者續  
之止於四十九代洪興祖又以史記并孔光僖傳及  
太子賢注與唐宰相世系諸書校正且作年譜列於卷  
首云

書目類

藝文志見闕書目一卷

右唐書藝文志近因朝廷募遺書刻牘布告境內下注  
書府所闕俾之訪求

崇文總目一卷

右唐朝崇文院書目也隋嘉則殿書三十六萬卷至唐散失已多崇文書比之唐十得二三而已自經丙午之亂存者無幾矣

吳氏西齋目一卷

右唐吳兢錄其家藏書凡一萬三千四百六十八卷兢自撰書附於正史之末又有續抄書列於後

道藏書目一卷



右皇朝鄧自和撰太洞真部八十一秩靈寶洞玄部九十秩太上洞部三十秩太真部九十六秩太平部一十六秩正一部三十九秩凡六部三百一十一秩

大宋史館書目一卷

右皇朝史館書總計一萬五千一百四十二卷

邯鄲圖書十志十卷

右皇朝李淑獻臣撰載其家所藏圖書五十七類釐為

十志

郡齋讀書志卷二下